

Sing vooraf: Psalm 103:5 (p. 505)

5 Hy sal nie altoos twis teen ons ontrou nie
of ewiglik die toorn teen ons behou nie,
want wie kan dra Gods eewige gramskap – wie?
Hy sal met ons nie na ons sondes handel,
ons nie vergeld die boosheid van ons wandel;
Hy straf ons, maar na al ons sondes nie.

Ons hulp is in die Naam van die Here wat die hemel en die aarde geskape het.
Geliefdes, genade en vrede vir u van God ons Vader en die Here Jesus Christus deur die kragtige
werking van God die Heilige Gees.

Amen.

Lofpsalm 43:1, 3 (p. 220)

1	HEER, doen my reg, hoor my gebede, en twis my twissaak tog vir my! Want waar ek heengaan, skrede^op skrede, beleër my 'n bose^en wrede, 'n huigelende teenparty wat my my saak bestry.	3	Send, HEER, uit hemelse geweste u lig en waarheid neer op my! Laat dié my bring na Sions veste, want daar is 't my die allerbeste, waar ek, u woning ingelei, my in u diens verbly.
---	---	---	--

Gebed

- **Doksologie:**
- **Aanbidding:**
- **Skuldbelydenis:**
- **Vergifnis:**
- **Dank:**
- **Smeking vir die nood van die gemeente en voorbidding vir die kerk, owerhede en sondige wêreld, asook die beroep op die beloftes van God**
- **Algemene bede:**
- **Verligting van die Gees ter wille van die Woorddiens:**

Amen.

Psalm 31:16 (p. 147)

16 U steek hul weg, al u vereerders; / daar's berging in die lig
van God se aangesig. / U steek hul weg vir samesweerders,
en hoed u gunsteling / vir tong- en twisgedinge.

Skriflesing: Spreuke 26

Teks: Spreuke 26:20

**Deur gebrek aan hout gaan die vuur dood, en as daar geen kwaadstoker is nie,
bedaar die twis. (Spreuke 26:20 AFR1953)**

**Sonder hout bly 'n vuur nie brand nie; sonder 'n kwaadstoker hou 'n rusie nie aan nie.
Daar is houtskool nodig vir gloeiende kole, hout vir 'n vuur, en 'n twissiek mens vir rusie
stook. (Spreuke 26:20, 21).**

Die Here gee die opdrag dat tug oor bakleierige en kwaadstokende mense toegepas moet word. Die Here wys daarop dat daar vrede kom wanneer sulke mense uitgedryf of weggejaag word. Dit staan in Spreuke 22:10:

As jy 'n ligsinnige mens wegjaag, hou die rusies op en kom die getwis en beledigings tot 'n end.

Daar is 'n voorbeeld in die Bybel waar die Here self tug toegepas het op mense wat baklei het.

- Dit is die geskiedenis van Abraham en Lot. Die Here het Abraham geroep om weg te trek van sy familie af.
- Die Here het met hom 'n verbond gesluit en beloof om hom te seën.
- Dit het inderdaad so gebeur – maar daar was iemand wat hierdie seën probeer uitbuit het. Dit was Lot.

Lot het saam met Abraham getrek, en so was hy ook die hele tyd binne die dampkring van die Here se seën.

- Lot het egter veeleisend geword, want terwyl hy net 'n gas saam met Abraham was, het hy en sy wagters rusie veroorsaak en baklei oor water vir die diere wat hom nie toegekom het nie.
- Hy en sy mense het vergeet dat hulle net met vergunning deel van Abraham se trek was.

Ons lees die geskiedenis in Genesis 13:7, 8

Die Kanaäniete en die Feresiete het ook nog in die gebied gewoon. Daar het toe 'n getwis ontstaan tussen Abram se veewagters en Lot s'n. Toe sê Abram vir Lot: “Daar behoort nie 'n getwis te wees tussen my en jou en tussen my veewagters en joune nie, want ons is familie.”

Die Here het destyds hierdie rusie gebruik om Lot en Abraham van mekaar te skei.

- Lot se latere geskiedenis in Sodom en sy omgang met sy dogters verduidelik waarom dit nodig was dat hy verwyder moes word uit die verbondshuisgesin.

Die erns van 'n saak soos hierdie raak ons inderdaad almal, want ons sondes en opstandigheid teen die lewe word deur die Here gesien as 'n twis met Hom.

- 'n Voorbeeld is waar die volk sonder water raak en dan oënskynlik met Moses twis, terwyl die saak ten diepste 'n saak teen die Here is.
- Dan kry ons moeilikheid met God self. Ons lees daarvan in Eksodus 17:2, 7 en in Numeri 20:13.

Hoe moet ons 'n rusie tussen gelowiges hanteer?

- Die Here waarsku ons in die Nuwe Testament dat ons nie met mekaar hof toe moet gaan nie.
- Gelowiges los die saak anders op.
 - Ons doen dit in die kerk.
 - In Deuteronomium 21:5 gee die Here die beginsel dat gelowiges wat in 'n rusie of geskil met mekaar beland het, die hulp van die kerklike owerhede moet inroep.
 - Die mense wat deur die Here uitverkies is om Hom te dien en om die gelowiges in die Naam van die HERE te seën, moet met hulle uitspraak elke twissaak afhandel.

Die Here maak egter voorsiening daarvoor dat daar sake kan wees wat nie kerklik opgelos kan word nie. Die Here stel dit so:

Dit kan gebeur dat twee mans in 'n hofsaak betrokke raak en dat die regters uitspraak lewer en die een onskuldig verklaar en die ander een skuldig . . . (Deuteronomium 25:1 AFR1983).

Die mens wat hierdie pad loop, moet net weet dat die een wat verkeerd is hom in fisiese wêreldse straf gaan vasloop.

Die Here waarsku verder dat hierdie sonde van twis 'n hele paar familieledede het wat saam met hom rondkuier by mense wat onwelowiglik lewe.

- Die lysie wat die Here maak, bevat die volgende sondes: drinkery en uitspattigheid, ontug en onsedelikheid, rusie en jaloesie (Romeine 13:13).
- In die Galasiërbrief (5:20) is daar 'n aansienlik langer sondelys: afgodery, towery, vyandskap, twis, jaloersheid, woede, rusies, verdeeldheid, skeuring.

Wat verwag die Here van ons? Mag ons nooit rusie maak nie? Die Here se antwoord is duidelik:

Ek wil dus hê dat die mans by elke plek van samekoms met 'n skoon gewete hande in gebed tot God moet ophef, vry van onmin en twis (1 Timoteus 2:8).

Net so duidelik is die opdrag wat die Here vir ons gee in 2 Timoteus 2:24:

'n Dienaar van die Here moenie rusie maak nie. Inteendeel, hy moet vriendelik wees teenoor almal, bekwaam om ander te leer en iemand wat onreg kan dra.

Ampsdraers moet spesifiek manne wees wat van niemand kwaadpraat nie en nie rusie soek nie. Hulle moet insiklik wees en altyd bedagsaam teenoor almal (Titus 3:2).

- Twis het hierdie element dat dit die mens wat rusie soek onredelik teen God kan maak.
- Hoeveel keer hoor ons nie die uitspraak: "Ek is kwaad vir die Here" nie?
 - Die Here waarsku dat Hy iemand wat met Hom twis verpletter.
 - Hy laat nie toe dat iemand met Hom twis nie (1 Samuel 2:10).

Jesaja het eenkeer uitgeroep:

Ellende wag vir hom wat die Een verwyf wat hom gevorm het, 'n potskerf tussen potskerwe van klei. Durf die klei vir die een wat dit vorm, sê: Wat maak jy?
(Jesaja 45:9 AFR1983)

Hy wil dan verder weet of ons die Een wat ons gemaak het, daarvan kan beskuldig dat Hy nie sy hande kan gebruik nie! (Jesaja 45:9 AFR1953)

Dit laat ons met die vraag: Hoe word ek dan uit hierdie sondige en ellendige lewe van my verlos?

- Die antwoord is: Deur Jesus Christus.
 - Sy kruisdood en twis het baie met mekaar te doen.
 - Die Here het Hom uitgelewer aan twis.
 - Voortdurend was die Fariseërs en Skrifgeleerdes met Hom in konflik. Nadat die Here die aand in Getsémané in hegtenis geneem is, het hierdie konflik uitgeloop op 'n hele string hofsake wat nie een tot 'n werklike beslissing kon kom nie.

Uiteindelik is Jesus deur 'n wêreldse regter kruis toe gestuur om die mense se gemoedere stil te maak.

- Die Here Jesus is toe gekruisig.
- Aan die kruisbalk moes Hy boet vir ons onredelikheid en geskille.

Daarmee het die Here 'n ou belofte waar gemaak, naamlik dat Hy nie vir altyd sondes toereken nie.

- Hy het gesê dat Hy nie vir altyd toornig bly nie, want anders sou dit die einde van die mense beteken, die mense aan wie Hy die asem gegee het (Jesaja 57:16).
- Die feit dat die Here Jesus vir ons sondes gesterf het (dus ook vir ons rusiemakerigheid), beteken nie dat ons nou sondeloos is nie.

Ons moet nog steeds versigtig wees en veg teen die sondes.

- Die Here leer ons dat mense wat Jesus Christus nie as Verlosser ken en dien nie, vervul is

met allerhande ongeregtigheid, slegtheid, hebsug en gemeenheid.

- Hulle is vol jaloesie, moord, twis, bedrog en kwaadwilligheid (Romeine 1:29).

Die Here waarsku ons dat alle wêreldsheid onder ons uitgeroei moet word. Hy sê daarvan:

Daar kom jaloesie en twis onder julle voor. Is dit nie omdat julle nog wêrelds is en julle wêrelds gedra nie? (1 Korintiërs 3:3 AFR1983)

Kom ons gee voor die volgende Nagmaal aan hierdie saak aandag en ondersoek onself.

- Waar ons hierdie kwaal by ons kry, roei ons dit uit,
- en vra die Here opreg vir vergifnis omdat ons met hierdie sonde teen Hom en ons naaste onreg gepleeg het.
- Ons dank Hom vir die genade dat ons deur die Heilige Gees tot insig gelei mag word.
- Ons lewe vorentoe in vrede met ons medegelowiges, terwyl ons mekaar se naam en eer verdedig en troetel.

Laat ons die vrug van die Heilige Gees in onself geniet en doen wat die Here sê:

By elke plek van samekoms hef ons ons hande met 'n skoon gewete in gebed tot God op – vry van onmin en twis (1 Timoteus 2:8).

Amen.

Slotgebed

Skrifberyming 9-1:11 (26:11)

11 Ons het, o HEER, u wet weerstrewende,
genade is al waar ons op pleit;
gee ons in Christus nuwe lewe,
om dit te doen uit dankbaarheid.

Die HERE sal jou seën en jou behoed;

Die HERE sal sy aangesig oor jou laat skyn en jou genadig wees;

Die HERE sal sy aangesig oor jou verhef en aan jou vrede gee.

Amen.

Dr MJ du Plessis
Gereformeerde Kerk Bellville
Datum: 22 Julie 2007 (aand)